



Elin Jones AS  
Y Llywydd  
Senedd Cymru  
Bae Caerdydd  
Caerdydd  
CF99 1SN

E-bost - [Llywydd@senedd.cymru](mailto:Llywydd@senedd.cymru)

22 Rhagfyr 2023

Annwyl Elin,

Cyflwynodd Llywodraeth y DU y Bil Dioddefwyr a Charcharorion i Dŷ'r Cyffredin ar 29 Mawrth 2023. Daeth hynt y Bil drwy Dŷ'r Cyffredin i ben ar 4 Rhagfyr 2023 a bydd yn symud i Gyfnod Pwyllgor Tŷ'r Arglwyddi ar 24 Ionawr 2024.

Pan gafodd y Bil ei gyflwyno, roedd yn cynnwys ystod eang o fesurau gan gynnwys gosod y Cod Dioddefwyr ar sail statudol, cyhoeddi canllawiau mewn perthynas â Chynghorwyr Annibynnol ar Drais Domestig a Chynghorwyr Annibynnol ar Drais Rhywiol, yn ogystal â chyflwyno rôl Eiriolwyr Cyhoeddus Annibynnol. Ystyriwyd bod y mesurau hyn o fewn cymhwysedd y Senedd a gosodais Femorandwm Cydsyniad Deddfwriaethol ar 19 Mai 2023 yn nodi safbwynt Llywodraeth Cymru ynghylch y darpariaethau hyn.

Mae fy swyddogion wedi bod yn ymwneud â swyddogion y Swyddfa Gartref a'r Weinyddiaeth Gyfiawnder drwy gydol hynt y Bil ac wedi bod yn monitro'r gwelliannau. Yn ystod Cyfnod Adrodd Tŷ'r Cyffredin, cyflwynwyd a derbyniwyd 151 o welliannau llywodraethol ac anllywodraethol. Dim ond ar ôl eu cyflwyno y cafodd swyddogion weld y gwelliannau i'r Bil. Er bod fy swyddogion wedi parhau i ystyried a yw'r gwelliannau hyn o fewn cymhwysedd y Senedd neu a ydynt yn newid yn sylweddol y cyngor a nodir yn y Memorandwm Cydsyniad Deddfwriaethol a osodwyd ar 19 Mai, nid yw wedi bod yn bosibl dadansoddi'r rhain na gosod Memorandwm Cydsyniad Deddfwriaethol atodol yn y cyfnod o bythefnos a nodir yn y Rheolau Sefydlog.

Yn ystod Cyfnod Pwyllgor Tŷ'r Arglwyddi, disgwylir y bydd gwelliannau pellach yn cael eu gwneud i'r Bil gan gynnwys gwelliannau posibl gan y Llywodraeth i addasu neu wrthdroi'r gwelliant anllywodraethol a dderbyniwyd yn flaenorol sy'n ymwneud â'r Ymchwiliad i Waed Heintiedig. Rydym hefyd yn parhau i drafod â Llywodraeth y DU ynghylch y materion a oedd gynt yn ddarostyngedig i femoranda cydsyniad deddfwriaethol fel y nodir uchod. Rydym yn disgwyl rhagor o welliannau ar rai o'r materion hynny yn ystod y Cyfnod Pwyllgor.

Canolfan Cyswllt Cyntaf / First Point of Contact Centre:  
0300 0604400

Bae Caerdydd • Cardiff Bay  
Caerdydd • Cardiff  
CF99 1SN

[Gohebiaeth.Jane.Hutt@llyw.cymru](mailto:Gohebiaeth.Jane.Hutt@llyw.cymru)  
[Correspondence.Jane.Hutt@gov.wales](mailto:Correspondence.Jane.Hutt@gov.wales)

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

Rwyf felly yn disgwyl gosod Memorandwm Cydsyniad Deddfwriaethol atodol pellach ynghylch y Bil yn dilyn Cyfnod Pwyllgor Tŷ'r Arglwyddi, gan nodi'r sefyllfa ddiweddaraf ar welliannau perthnasol cyn y ddadl ddisgwyliedig ar y cynnig cydsyniad deddfwriaethol. Gan ystyried yr amserlenni, bydd y Memorandwm Cydsyniad Deddfwriaethol atodol hwnnw hefyd yn ymdrin ag unrhyw welliannau perthnasol sydd wedi'u gwneud yn ystod Cyfnod Adrodd Tŷ'r Cyffredin. Ein disgwyliad ar hyn o bryd yw i'r ddadl ar y cynnig cydsyniad gael ei chynnal ddiwedd mis Chwefror.

Rwyf yn anfon copi o'r llythyr hwn at y Cwnsler Cyffredinol a Gweinidog y Cyfansoddiad, Mick Antoniw AS, y Gweinidog Materion Gwledig a Gogledd Cymru, a'r Trefnydd, Lesley Griffiths AS a Chadeirydd y Pwyllgor Deddfwriaeth, Cyfiawnder a'r Cyfansoddiad, Huw Irranca-Davies AS.

Yn gywir,

A handwritten signature in black ink that reads "Jane Hutt". The signature is written in a cursive style with a horizontal line above the first few letters.

**Jane Hutt AS/MS**  
**Gweinidog Cyfiawnder Cymdeithasol a'r Prif Chwip**  
**Minister for Social Justice and Chief Whip**